

Die begrip en produksie van persoonlike voornaamwoorde deur Afrikaanssprekende 6-jariges*

Frenette Southwood

Departement Algemene Taalwetenskap, Universiteit Stellenbosch, 7600 Stellenbosch, Suid-Afrika
E-pos: fs@sun.ac.za

1. Inleiding

Voornaamwoorde is besonder moeilik vir jong kinders om te bemeester, aangesien die vorm daarvan aanhoudend verander na gelang van die konteks: voornaamwoorde verander volgens die getal en geslag van die mense na wie verwys word, volgens wie die spreker en die hoorder is, en volgens die grammatikale rol van die voornaamwoord in die sin (Moore 2001: 208; Ricard, Girouard, en Gouin Décarie 1999: 68-69; kyk ook Campbell, Brooks, en Tomasello 2000). Voornaamwoorde se deiktiese eienskappe veroorsaak verder dat hulle nie aan kinders gemodelleer kan word sonder om moontlike verwarring te veroorsaak nie; kinders moet luister na die gebruik van voornaamwoorde in die taal van ander sprekers om vertroud te raak met die korrekte gebruik daarvan (Cole, Oshima-Takane, en Yaremko 1994: 115).

Die verwerwing van voornaamwoorde in Engels word reeds lank uitgebreid ondersoek (kyk bv. Cooley 1908 en Bain 1936), maar daar is nog nie 'n volledig uitgewerkte teorie wat al die feite kan verklaar nie, veral nie die gebruik van voornaamwoordkasus nie (Schütze 1999: 754). Daarenteen is data oor die ontwikkeling van die voornaamwoordsisteem in kindersprekers van ander tale nog skraps. Daar word egter aanvaar dat, ongeag die taal, elke voornaamwoord woord vir woord geleer moet word, aangesien daar geen algemene reëls is

wat as gids kan dien tydens die aanleer van die fonetiese vorm van die voornaamwoord nie (Rispoli 1994, 1998a, 1998b).

Gestandaardiseerde taaltoetse wat gebruik word om taalprobleme by kinders te diagnoseer sluit gereeld items in wat die begrip en produksie van voornaamwoorde evaluateer. Daar is drie gestandaardiseerde taaltoetse vir gebruik met Afrikaanssprekende kinders, nl. die *Toets vir Mondelinge Taalproduksie* (Vorster 1980), die *Afrikaanse Semantiese Taalevalueringmedium* (Pretorius 1989), en die *Afrikaanse Reseptiewe Woordeskattoets* (Buitendag 1994). Van hierdie drie bevat slegs die *Afrikaanse Semantiese Taalevalueringmedium* 'n subtoets vir die evaluering van begrip en produksie van voornaamwoorde.

Waar hierdie beperkte subtoets nie uitgevoer word nie, maak evaluateerders (soos spraaktaalterapeute en onderwysers) gebruik van self-opgestelde informele toetse om vas te stel hoe kinders voornaamwoorde verstaan en gebruik. Om die resultate van hierdie informele toetse te kan interpreteer (d.i., om te kan besluit of 'n kind se ontwikkeling van kennis oor voornaamwoorde tipies, afwykend, of vertraag is) word normatiewe data benodig. Onlangse gegewens wat op 'n wydverspreide populasie genormeer is, is nie vir Afrikaans beskikbaar nie. Die algemene gebruik is om enige verskil tussen die kennis van voornaamwoorde van volwasse sprekers van Afrikaans en dié van kindersprekers van 6 jaar en ouer as atipies te bekou en remediërend op te tree. Die vraag ontstaan egter of Afrikaanssprekende kinders se ontwikkeling ten opsigte van persoonlike voornaamwoorde reeds teen 6 jaar afgehandel is en, indien nie, watter tipe foute as tipies en watter as afwykend bekhou kan word. Die studie wat hier bespreek word, is uitgevoer in 'n poging om hierdie vraag te begin beantwoord.

2. Metodologie

2.1 Deelnemers

Twintig Afrikaanssprekende 6-jariges uit eentalige Afrikaanssprekende huise het aan die studie deelgeneem. Al die deelnemers het volgens hul ouers en klasonderwyseresse normale gehoor en tipiese intellektuele ontwikkeling getoon en het geen tekens van neurologiese afwykings of emosionele probleme gehad nie. Tien van die deelnemers se taalontwikkeling was volgens hul ouers en klasonderwyseresse tipies vir hul ouderdom terwyl die ander 10

deur spraak-taalterapeute as taalgestremd gediagnoseer is. Inligting oor die middele waarmee hierdie diagnose deur die terapeute gemaak is, word in bylae A1 en A2 gegee. Kinders met taalgestremdheid is slegs in die studie ingesluit indien (i) hul reseptiewe taalouderdomstelling ten minste 6 maande onder die laagste een van hul mentale of kronologiese ouerdom was; (ii) hul ekspressiewe taalouderdomstelling ten minste 12 maande onder die laagste een van hul mentale of kronologiese ouerdom was; of (iii) hul gekombineerde ouerdomstelling ten minste 12 maande onder die laagste een van hul mentale of kronologiese ouerdom was (kyk bv. Stark en Tallal 1981).

Al die tipies-ontwikkelende deelnemers het in Stellenbosch gewoon en/of skoolgegaan. Uit die 10 deelnemers met taalgestremdheid was drie in Bloemfontein woonagtig, twee in die noordelike voorstede van Kaapstad, twee in Oudtshoorn, een in Somerset-Wes, en een in Hartenbos. Al twintig deelnemers was volgens hul onderwyseresse en/of terapeute sprekers van sogenaamde Standaardafrikaans.

2.2 Prosedures

Die tipies-ontwikkelende kinders is via hul dag- of nasorgsentra gekontak terwyl die kinders met taalgestremdheid deur hul spraak-taalterapeute na die studie verwys is. Nadat toestemming vir deelname aan die studie van die deelnemers en hul ouers verkry is, het al 20 deelnemers 'n gehoorsiftingstoets ondergaan (volgens die riglyne van die *American Speech, Language, and Hearing Association* (ASHA) 1997-2006), om te verseker dat hul gehoor binne normale perke is. Slegs kinders met taalgestremdheid wat 'n nie-verbale IK-telling van 85 of hoër gehad het, het as deelnemers gekwalifiseer (kyk Stark en Tallal 1981). Waar IK-tellings nie reeds beskikbaar was nie, is potensiële deelnemers na opvoedkundige sielkundiges verwys vir toetsing. Hierna is drie eksperimentele take wat deur die navorser opgestel is met elke deelnemer individueel uitgevoer. Elke taak het oefenitems gehad om die deelnemers vertroud te maak met die taak. Die take is vooraf, tydens 'n loodsstudie, toegepas om vas te stel of die leksikale items aan voorskoolse kinders bekend is en of die kognitiewe eise wat aan die kinders gestel word, redelik is (kyk Southwood 2005, 2006). 'n Spontane taalmonster van 30 minute is ook versamel tydens vryespel met houtblokkies, plastiek kombuismeubels, en mannetjies met bybehore soos hoedjies, bekers, en besems. Tydens taalmonsterontlokking het die navorser en deelnemer alleen in 'n stil kamer in sy/haar skool, dagsorgsentrum, of huis gespeel. Die navorser het die sessie begin deur die deelnemer uit te nooi om saam met haar

die mannetjies aan te trek, 'n huis met die blokkies te bou, en/of die kombuismeubels reg te rangskik. As 'n deelnemer vir lang periodes stil was, het die navorser verskeie tegnieke gebruik om gesprek aan te moedig, insluitend die maak van stellings (aan haarself of aan die deelnemer gerig) en die vra van beide *w-* en *ja/nee*-vrae. Hierdie vroeë het oor onderwerpe gehandel soos verjaarsdagvieringe, troeteldiere, en deelnemers se families – onderwerpe wat deur Southwood en Russell (2004) geskik gevind is vir bespreking met voorskoolse kinders.

2.3 Eksperimentele take

Twee begrips- en een produksietaak is uitgevoer. In die literatuur is daar geen voorbeeld van eksperimentele take wat gebruik kan word om voornaamwoordbegrip en -gebruik by voorskoolse kinders te toets nie. In hierdie studie is daar dus van self-opgestelde take gebruik gemaak. Hierdie take is egter gebaseer op take wat met sukses gebruik is om die begrip en/of gebruik van meervoudsvorme, kasus, en tydsvorme deur voorskoolse kinders van verskeie taalagtergronde te toets (kyk bv. Håkansson 2001; Hansson en Leonard 2003; Leonard, Salameh, en Hansson 2001; Loeb en Leonard 1991; Marchman, Saccuman, en Wulfeck 2004; Ravid, Levie, en Ben-Zvi 2003).

Alle toetsitems verskyn in bylaag B. In Afrikaans word voornaamwoorde vir kasus, persoon, en getal gemerk. By die tweedepersoon word daar verder 'n onderskeid getref tussen formele en informele aanspreekvorme en by die derdepersoon in die enkelvoud tussen semantiese geslag. Alle persoon-getal-kasus-semantiese geslag-kombinasies is getoets, maar die formele vorm van die tweedepersoon is nie getoets nie.

Die eerste begripstaak het prentseleksie behels. Die deelnemer is 'n prent van 'n vrou gewys en ingelig dat hierdie vrou deurgaans die navorser sal wees. Hierna is die manlike deelnemers 'n prent van 'n seun en die vroulike deelnemers 'n prent van 'n meisie gewys en ingelig dat dit hulle is. Oefenitems is gebruik om te verseker dat die deelnemers hierdie verduidelikings verstaan het. Hierna is die deelnemer 'n vel papier met vier prente gewys en gevra om te wys na dié prent wat by die navorser se uiting pas. Daar is byvoorbeeld aan die deelnemer 'n vel met die volgende prente van 'n persoon of persone wat by 'n tafel sit, gewys: een van 'n vrou (nie die navorser nie) en die kind wat die deelnemer verteenwoordig; een van twee vrouens; een van 'n vrou en 'n kind (wat die navorser en deelnemer verteenwoordig); en een van die

kind wat die deelnemer verteenwoordig op sy/haar eie. Die navorser sê dan *Wys vir my "Julle sit by die tafel"*. Die deelnemer het dus 'n keuse tussen 'n prent wat pas by *Julle sit by die tafel* (die teiken), *Hulle sit by die tafel* of *Ons sit by die tafel* (waar die getal van die voornaamwoord dieselfde gehou word maar die persoon van dié van die teiken verskil), en *Jy sit by die tafel* (waar die persoon van die voornaamwoord dieselfde gehou word maar die getal van dié van die teiken verskil). Die taak het uit 32 items bestaan: elke persoon-getal-kasus-geslag-kombinasie is een maal getoets.

Die tweede begripstaak was 'n oordeeltaak. Die doel hiervan was om vas te stel of die deelnemer korrekte en verkeerde gebruik van voornaamwoorde deur die navorser kon herken. Tydens hierdie taak het die navorser en deelnemers na prente gekyk van mense en diere wat verskeie aksies uitvoer (bv. van 'n seun wat deur 'n koei gejaag word) terwyl die navorser 'n beskrywing van die prent gee. Hierdie beskrywing was óf (i) grammatikaal en het by die prent gepas (*Die koei jaag hom*), óf (ii) ongrammatikaal maar het by die prent gepas (**Die koei jaag hy*), óf (iii) het nie by die prent gepas nie (*Die koei jaag hulle*). Hierdie taak het ook uit 32 items bestaan, met elke persoon-getal-kasus-geslag-kombinasie wat een maal getoets is.

Die produksietaak het sinsvoltooiing behels. Twee prente is aan die deelnemer gewys terwyl die navorser 'n sin begin sê waarvan die eerste deel by die eerste prent pas. Daar is dan van die deelnemer verwag om die sin só te voltooi dat die tweede deel by die tweede prent pas. Die navorser het byvoorbeeld gewys na 'n prent van 'n seun wat 'n eekhoring voer en gesê: *Hy voer die eekhorinkie, maar ...* en dan gewys na 'n prent van 'n meisie wat voëls voer. Deelnemers is vooraf gesê dat "ons in hierdie speletjie nie gaan praat van *die dogtertjie, die oom* of *die hond* nie, maar van *ons, hy, sy, julle*, en so aan". Die taak het uit 64 items bestaan, met twee geleenthede om elke persoon-getal-kasus-geslag-kombinasie te produseer.

2.4 Data-transkripsie en -optekening

Die response op die items van die eksperimentele take is op self-opgestelde toetsvorms aangeteken. Spontane selfkorreksies is deurgaans toegelaat en voor-finale response is geïgnoreer. Response is as volg gekategoriseer: (i) korrekte response, (ii) verkeerde response, en (iii) onbruikbare response. Laasgenoemde sou insluit response waar 'n deelnemer na twee of meer prente gewys het tydens die prentseleksietaak, waar die deelnemer *Ek weet nie* in plaas van *ja* of *nee* gesê het tydens die oordeeltaak, of waar 'n voornaamwoord deur 'n

naamwoord vervang is of waar bv. *hulle* deur *hy en sy* vervang is tydens die sinsvoltooiingstaak. Waar 'n deelnemer geen respons op 'n item van enige van die drie take gegee het nie, is dit ook as onbruikbaar gekategoriseer.

Die eerste 100 uitinge wat in die taalmonster van elke deelnemer voorgekom het, is ortografies getranskribeer, insluitende uitinge wat kort onverstaanbare segmente bevat. Uitinge wat 'n woordelike herhaling van die voorafgaande uiting van die navorser was asook deelnemers se herhalings van hul eie direk-voorafgaande uitinge is nie ingesluit nie (kyk Johnston 2001: 158). Brown (1973: 54) se riglyne – dat vullers soos *um* en *o* geïgnoreer word terwyl *ja* en *nee* ingesluit word – is gevolg. Die aantal kere wat persoonlike en besitlike voornaamwoorde korrek en verkeerd gebruik is, is getel en opgeteken. Verkeerde gebruik is beskou as vervanging van 'n voornaamwoord met een wat verskil in terme van getal, persoon, semantiese geslag, kasus of 'n kombinasie van enige van dié vier aspekte. Geen ontoepaslike weglatting van voornaamwoorde uit verpligte kontekste het voorgekom nie, so die verkeerde gebruik van voornaamwoorde sluit nie weglatings in nie. Natuurlike ellipsis het wel voorgekom (bv. in *Gaan nou met hom speel* in plaas van *Ek gaan nou met hom speel*), maar aangesien dit aanvaarbaar is in spontane gesprekvoering is dit nie as 'n fout aangeteken nie.

2.5 Statistiese ontleding

Daar is nie verwag dat die verspreiding van tellings in die twee groepe normaal sal wees nie, want monsters van kinders met spesifieke taalgestremdheid neig tot heterogeniteit. Hierdie heterogeniteit kan nie beperk word as die monstergrootte so klein is soos hierdie studie s'n nie. Om hierdie rede is die nie-parametriese Mann-Whitney-toets gebruik wat die gemiddelde rangordes toegeken aan die gevalle in die twee groepe bereken, en sodoende kontroleer vir buitengewoon goeie of swak prestasie van individuele deelnemers. Die vlak van beduidendheid is deurgaans as 0.05 geneem.

3. Resultate en bespreking

In die drie onderstaande tabelle word die response van elke deelnemer op die drie take eers apart gegee en daarna word 'n gemiddeld vir elke groep (die groep deelnemers met spesifieke taalgestremdheid en die groep tipies-ontwikkelendes) gegee. Resultate word telkens

aangebied in die vorm van persentasies. Slegs korrekte en verkeerde response (nie onbruikbares nie) is in ag geneem.

Die resultate van die prentseleksietaak word in Tabel 1 weergegee. Eers word daar aangedui watter persentasie van die prente korrek geselekteer is. Daarna word daar aangedui watter van die geselekteerde prente (korrek of nie) wel verteenwoordigend was van 'n voornaamwoord met onderskeidelik dieselfde getal, persoon, en semantiese geslag as die teiken.

Tabel 1. Persentasie korrekte response op die prentseleksietaak

Oud ¹	Vnw korrek		Getal korrek		Persoon korrek		Geslag korrek ⁴	
	STG ²	TO ³	STG	TO	STG	TO	STG	TO
6;0	44 ⁵	-	72	-	66	-	83	-
6;0	66	-	78	-	69	-	100	-
6;1	-	59	-	94	-	69	-	58
6;2	-	81	-	97	-	81	-	100
6;3	-	91	-	100	-	94	-	93
6;4	100	94	100	100	100	94	100	100
6;6	-	91	-	97	-	94	-	92
6;7	59	91	78	97	78	94	67	93
6;7	45 ⁵	-	94	-	65	-	64 ⁶	-
6;8	84	94	91	100	91	97	92	93
6;9	31	81	66	100	56	91	58	75
6;11	56	78	88	91	69	84	83	92
6;11	72	84	100	100	75	88	92	92
6;11	91	-	100	-	91	-	100	-
Gem ⁷	65	84	87	98	76	88	92	88
	(208/ 319)	(270/ 320)	(276/ 319)	(312/ 320)	(242/ 319)	(283/ 320)	(100/ 119)	(106/ 120)

Notas: (1) Ouderdom in jare;maande. (2) Deelnemers met spesifieke taalgestremdheid. (3) Tipies-ontwikkelende deelnemers. (4) Slegs derdepersoon-enkelvoud voornaamwoorde is hier in ag geneem. (5) Een respons uit die 32 was onbruikbaar. (6) Een respons uit die 12 was onbruikbaar. (7) Groepsgemiddeld.

Dit blyk dat die deelnemers met spesifieke taalgestremdheid swakker gevaaar het in terme van hul begrip van voornaamwoorde as die tipies-ontwikkelendes. Kenmerke waarmee die meeste foute gemaak is, was persoon vir die groep met taalgestremdheid, maar persoon en geslag vir die tipies-ontwikkelendes. 'n Voorbeeld van 'n persoonsfout is waar die prent wat pas by *Die*

reën val op ons geselekteer word in plaas van die teikenprent wat pas by die *Die reën val op hulle*, terwyl 'n voorbeeld van 'n fout rakend geslag is waar *Hy eet roomys* geselekteer word in plaas van *Sy eet roomys*.

Die statisties beduidende verskille tussen die twee groepe was vir totale aantal voornaamwoorde korrek ($p=0.044$), getalkenmerk korrek ($p=0.045$), en persoonkenmerk korrek ($p=0.033$). Vir die aantal kere waarop die semantiese geslag van die voornaamwoord korrek aangedui is, was daar egter nie 'n statisties beduidende verskil tussen die twee groepe nie ($p=0.464$).

Tabel 2 bevat die response op die oordeeltaak. Ook in hierdie taak het die deelnemers met spesifieke taalgestremdheid beduidend swakker gevaar as die tipies-ontwikkelendes ($p=0.002$). Soos wat die geval vir die prentseleksietaak was, het aantal korrekte response nie liniêr toegeneem met 'n toename in ouderdom (in maande) nie.

Tabel 2. Persentasie korrekte response op die oordeeltaak

Ouderdom (jaar; maande)	STG ¹	TO ²
6;0	50	-
6;0	50	-
6;1	-	66
6;2	-	84
6;3	-	78
6;4	84	81
6;6	-	72
6;7	53	84
6;7	53	-
6;8	56	88
6;9	50	78
6;11	72	78
6;11	50	81
6;11	72	-
Gemiddeld	59 (189/320)	79 (253/320)

Notas: (1) Deelnemers met spesifieke taalgestremdheid. (2) Tipies-ontwikkelende deelnemers.

Die response van die twee groepe deelnemers op die sinsvoltooiingstaak word in Tabel 3 aangetref. Die persentasie korrekte response word eers aangedui, gevvolg deur die persentasies

response (korrek al dan nie) waarvan onderskeidelik die getal, persoon, kasus, en semantiese geslag met dié van die teiken ooreengestem het.

Tabel 3. Persentasie korrekte response op die sinsvoltooiingstaak

Oud ¹	Vnw. Korrek		Getal korrek		Persoon korrek		Kasus korrek		Geslag korrek ⁴	
	STG ²	TO ³	STG	TO	STG	TO	STG	TO	STG	TO
6;0	59 ⁵	-	92	-	74	-	93	-	83	-
6;0	77 ⁷	-	88	-	87	-	100	-	93	-
6;1	-	75 ⁷	-	89	-	95	-	98	-	72
6;2	-	96 ⁷	-	98	-	98	-	100	-	100
6;3	-	88 ⁷	-	98	-	93	-	96	-	100
6;4	95 ⁶	95	100	95	100	100	96	100	94	100
6;6	-	52 ⁵	-	100	-	64	-	88	-	76
6;7	66 ⁶	92 ⁶	90	98	78	95	95	100	95	94
6;7	40 ⁶	-	89	-	60	-	91	-	50	-
6;8	83 ⁶	93 ⁶	93	100	91	97	100	98	100	94
6;9	41 ⁶	95 ⁶	75	100	72	96	91	98	57	94
6;11	53 ⁵	93 ⁵	90	100	63	93	98	98	77	100
6;11	80 ⁸	82 ⁶	100	93	89	91	91	96	100	100
6;11	86 ⁸	-	96	-	96	-	94	-	100	-
Gem ⁹	67	86	91	97	80	92	95	97	84	93
	(376/	(474/	(509/	(538/5	(448/	(508/	(530/	(538/	(163/	(183/
	560)	553)	560)	53)	560)	553)	560)	553)	193)	196)

Notas: (1) Ouderdom in jare;maande. (2) Deelnemers met spesifieke taalgestremdheid. (3) Tipies-ontwikkelende deelnemers. (4) Slegs derdepersoon- enkelvoud voornaamwoorde is hier in ag geneem. (5) Een tot 4 response uit die 64 was onbruikbaar. (6) Vyf tot 8 response uit die 64 was onbruikbaar. (7) Nege tot 12 response uit die 64 was onbruikbaar. (8) Dertien tot 18 response uit die 64 was onbruikbaar. (9) Groepsgemiddeld.

Soos die geval vir die twee begripstake was, het die deelnemers met spesifieke taalgestremdheid ook in die produksietaak beduidend swakker gevaaar as hul tipies-ontwikkelende eweknieë ($p=0.028$ vir totale aantal voornaamwoorde korrek geproduseer; $p=0.045$ vir getalkenmerk korrek gerealiseer). Alhoewel die tipies-ontwikkelendes beter gevaaar het as die deelnemers met taalgestremdheid in terme van die korrekte realisering van kasus en semantiese geslag, was die verskille tussen groepe hier nie statisties beduidend nie ($p=0.123$ en $p=0.308$ onderskeidelik).

Die aspek wat deur beide groepe die meeste verkeerd gekry is, was persoon, maar selfs hier was daar 'n beduidende verskil tussen die twee groepe ($p=0.037$). Dit is opvallend dat deelnemers van beide groepe baie gereeld die gebruik van *julle* vermy het (deur bv. *jy en sy te sê*) of *julle* met *hulle* vervang het (lg. het ook gereeld in die prentseleksietaak voorgekom). Dit is onwaarskynlik dat hierdie gereelde vervanging van *julle* met *hulle* toegeskryf kan word aan 'n tekort aan perspektiefneming, aangesien Richard, Girouard, en Gouin Décarie (1999) bevind het dat kinders van 2 jaar 6 maande reeds daartoe instaat is om die perspektief van die spreker, hoorder, en nie-aangespreekte te verstaan. Meer waarskynlik is die Rispoli-verduideliking dat *hulle* in plaas van *julle* herroep word omdat dié twee vorme fonologies nou verwant is en moontlik ook omdat daar effens meer voornaamwoorde met die vorm *h-* (*hulle, haar, hy, hom*) is as met die vorm *j-* (*jy, jou, julle*).

Volgens Rispoli se Voornaamwoord Paradigma Bou Hipotese word die herroeping van 'n woord uit die voornaamwoordparadigma geleei deur die grammaticale kenmerke van die woord asook deur die fonologiese kenmerke van die voornaamwoordparadigma. As die korrekte voornaamwoord nie onmiddellik herroep kan word nie, word die kind se mentale "soektog" beïnvloed deur faktore soos die aantal selle wat die spesifieke woord in die paradigma vul, die fonologiese struktuur van die woord, en die fonetiese prominensie van die woord. Hierdie hipotese voorspel byvoorbeeld dat Engelssprekende kinders, as hulle nie onmiddellik *she* kan herroep nie, *she* met *her* sal vervang, onder andere omdat *her* meer male in die voornaamwoordparadigma voorkom as *she* ('n voorspelling wat deur die resultate van Rispoli (1998a) en Moore (1995) ondersteun is). *Them* mag ook onder sulke omstandighede deur *they* vervang word weens die groot ooreenkoms in fonologiese vorm van dié twee woorde. Anderson (1998) se bevindinge oor Spaanssprekende kinders bied ook ondersteuning vir Rispoli se hipotese: Meer kasusfoute is met die eerstpersoon nominatief *yo* begaan (waar die inhoud van die ander eerstpersoon-selle in die paradigma *me* of *mio(a)* is), as vir die tweedopersoon nominatief *tú* (waar die inhoud van die ander tweedopersoon-selle die fonologies-verwante *te* of *tuyo(a)* is).

Tabel 4 bevat die ontleding van die gebruik van persoonlike voornaamwoorde deur die twee groepe deelnemers in die spontane taalmonsters. Die ontleding word in die vorm van routellings gegee, d.i., die aantal kere wat elke voornaamwoord in die taalmonsters voorgekom het, word aangedui. Die totale aantal kere waarop voornaamwoorde gebruik is,

was 537 vir die groep met taalgestremdheid (98.5% daarvan korrek) en 859 vir die tipies-ontwikkelende groep (100% daarvan korrek). Die feit dat die deelnemers met taalgestremdheid opmerklik minder gebruik maak van voornaamwoorde as hul tipies-ontwikkelende eweknieë dui moontlik op 'n poging tot vermyding van persoonlike voornaamwoorde deur kinders met taalgestremdheid.

Tabel 4. Aantal kere waarop voornaamwoorde gebruik is deur kinders met taalgestremdheid en tipies-ontwikkelendes in spontane taalmonsters

Kasus	Persoon								
	1 ^e ekv.	1 ^e mv.	2 ^e ekv.	2 ^e mv.	2 ^e ekv./mv. formeel	3 ^e ekv. manlik	3 ^e ekv. vroulik	3 ^e ekv. ongeslagtig	3 ^e mv.
	<i>ek</i>	<i>Ons</i>	<i>jy</i>	<i>julle</i>	<i>u</i>	<i>hy</i>	<i>sy</i>	<i>dit</i>	<i>hulle</i>
Nom.	<i>ek</i>	<i>Ons</i>	<i>jy</i>	<i>julle</i>	<i>u</i>	<i>hy</i>	<i>sy</i>	<i>dit</i>	<i>hulle</i>
STG ¹	164	19	28	2	0	68	12	59	28/33 ³
TO ²	216	106	25	4	0	95	48	84	48
Gen.	<i>my</i>	<i>ons</i>	<i>jou</i>	<i>julle</i>	<i>u</i>	<i>sy</i>	<i>haar</i>	<i>sy</i>	<i>hulle</i>
STG	44	3	7	1	0	17/19 ³	2	0	8
TO	65	14	2	1	0	24	5	1	9
Dat.	<i>my</i>	<i>ons</i>	<i>jou</i>	<i>julle</i>	<i>u</i>	<i>hom</i>	<i>haar</i>	<i>dit/daar-</i>	<i>hulle</i>
STG	3	2	2	0	0	9	3	4	5/6 ³
TO	6	6	2	0	0	11	5	8	1
Akk.	<i>my</i>	<i>ons</i>	<i>jou</i>	<i>julle</i>	<i>u</i>	<i>hom</i>	<i>haar</i>	<i>dit</i>	<i>hulle</i>
STG	1	2	1	0	0	23	0	6	6
TO	4	0	1	0	0	17	1	47	3

Notas: (1) Deelnemers met spesifieke taalgestremdheid. (2) Tipies-ontwikkelende deelnemers. (3) Aantal kere waarop 'n voornaamwoord korrek gebruik is uit die totale aantal kere waarop die voornaamwoord gebruik is.

Soos Tabel 4 aandui, is alle voornaamwoorde deurgaans korrek deur die tipies-ontwikkelendes gebruik, terwyl die deelnemers met taalgestremdheid 'n klein aantal kere die verkeerde voornaamwoord in plaas van *sy* (manlik genitief) en *hulle* (nominatief en datief) gebruik het. Dit in teenstelling met beide groepe se tellings op die sinsvoltooatings- (ontlokte produksie-) taak, moontlik omdat kinders slegs daardie voornaamwoorde spontaan geproduseer het waarmee hulle gemaklik was, terwyl die sinsvoltooingstaak van hulle verwag het om alle voornaamwoorde te produseer.

Die resultate in Tabel 4 kontrasteer met dié van Moore (1995) wat bevind het dat Engelssprekende 5-jariges met spesifieke taalgestremdheid meer voornaamwoordfoute maak as tipies-ontwikkelende 5-jariges in 'n taalproduksietaak soortgelyk aan die een wat tydens taalmonsterontlokking in hierdie studie gebruik is. Moore (2001) het bevind dat Engelssprekende kinders (taalgestremd en tipies-ontwikkelend) geen produksiefoute met die persoon van voornaamwoorde gemaak het nie, en bykans geen met die getal nie. Foute met kasus en geslag is wel gemaak, maar tipies-ontwikkelende kinders het beduidend beter gevaaar met korrekte produksie van kasus van voornaamwoorde as taalgestremdes. Hier teenoor het Moore (1995) se tipies-ontwikkelende kinders geen kasusfoute gemaak nie, terwyl hierdie tipe fout die algemeenste een van die kinders met taalgestremdheid was. Een rede wat Moore (1995: 69) aanvoer vir die hoë proporsie kasusfoute in die taal van kinders met spesifieke taalgestremdheid is dat kasus – anders as persoon, semantiese geslag of getal – nie korreleer met verskille in die regte wêreld nie. Kasus hang van die voornaamwoord se linguistiese konteks af, nie van die werklike geslag of getal van die referent(e) nie.

In hierdie studie is slegs 2 uit 'n moontlike 537 kasusfoute deur die kinders met taalgestremdheid begaan; beide kere was dit die genitiewe *sy* wat as *hom* gerealiseer is (soos in *hom bene* in plaas van *sy bene*). Daar is ook bevind dat kasus minder problematies is vir taalgestremde en tipies-ontwikkelende kinders as persoon en geslag. Dit blyk nie soseer uit die taalmonsters nie, maar wel uit die eksperimentele take. In hierdie opsig blyk die Afrikaanse data verkry in hierdie studie te verskil van die beskikbare Engelse data.

4. Slot

Dit blyk dat Afrikaanssprekende kinders – selfs dié sonder enige gerapporteerde taalprobleme – se ontwikkeling ten opsigte van persoonlike voornaamwoorde nog nie teen 6 jaar afgehandel is nie. Verder blyk dit dat Afrikaanssprekende kinders met en sonder taalgestremdheid dieselfde tipe fout maak in take van begrip en produksie van voornaamwoorde; die kinders met taalgestremdheid begaan net meer van hierdie foute as hul tipies-ontwikkelende eweknieë.

Rispoli (2005: 108) waarsku dat foute in voornaamwoordvorm – spesifiek in kasus – nie voorkom bloot omdat kinders se grammatika nog onvolwasse is nie. Selfs met 'n onvolwasse

grammatika kan foute geminimaliseer word as kinders nie poog om meer ambisieus op te tree as waarvoor hulle die kapasiteit het nie. Hiermee word bedoel dat foute beperk kan word as kinders net dié selle van hul voornaamwoordparadigma gebruik waarvoor daar reeds inskrywings is en wat dus maklik herroepbaar is, en as naamwoorde en demonstratiewe in die plek van moeilik herroepbare voornaamwoorde gebruik word. Aangesien dit uit toetsing blyk dat Afrikaanssprekende 6-jariges se voornaamwoordgebruik nog nie dié van volwasse sprekers van die taal reflekteer nie (in die lig van die gebrek aan toepaslike norme vir volwassenes se voornaamwoordgebruik word daar aanvaar dat volwassenes geen sistematiese foute in ontlokte of spontane spraak sou maak nie), kan daar aanvaar word dat die hoë persentasie korrekte voornaamwoordgebruik in hul spontane taal ten minste deels toegeskryf kan word aan die strategie wat Rispoli beskryf.

Finestack, Fey, en Catts (2006) het Engelssprekende jong skoolgaande kinders met en sonder spesifieke taalgestremdheid se narratiewe ontleed in terme van hul gebruik van volledige voornaamwoordverwysings (m.a.w. hul gebruik van voornaamwoorde waar dit duidelik is waarna die voornaamwoord verwys). Daar is bevind dat volledige voornaamwoordverwysings as meting nie sensitief genoeg was om te onderskei tussen die twee groepe nie. 'n Soortgelyke bevinding is vir die Afrikaanssprekende kinders in hierdie studie gemaak: daar is geen noemenswaardige verskil tussen die kinders met en dié sonder taalgestremdheid in terme van hul akkuraatheid van voornaamwoordgebruik in spontane taal nie. Wanneer prentseleksie-, oordeel-, en sinsvoltooingstake egter gebruik word (d.i., wanneer ontlokte in plaas van spontane voornaamwoordgebruik ondersoek word), blyk gebruik van persoonlike voornaamwoorde as meting wel sensitief genoeg te wees om tussen 6-jariges met en sonder spesifieke taalgestremdheid te onderskei. Weens die beperkte aantal deelnemers aan hierdie studie, kan so 'n veralgemeening egter nog nie met 'n hoë mate van sekerheid gemaak word nie.

Benewens die beperkte aantal deelnemers, is daar 'n ander faktor wat die veralgemeenbaarheid van die bevindinge erg beperk, naamlik dat alle deelnemers aan hierdie studie sprekers van sogenaamde Standaardafrikaans was. Daar bestaan gedokumenteerde streeks- en dialektale verskille in die gebruik van voornaamwoorde; hierdie variasie is egter nie in dié studie in ag geneem nie. Om hierdie rede kan die resultate nie veralgemeen word na sprekers van nie-standaard variëteite van Afrikaans nie.

Toekomstige studies oor hierdie onderwerp kan poog om meer deelnemers, deelnemers wie se Afrikaans as nie-standaard beskou word, deelnemers van 'n wye geografiese area, en/of deelnemers wat jonger as 6 is in te sluit. Dit behoort 'n bydrae te lewer tot die kennis oor voornaamwoord-ontwikkeling in die breë Afrikaanssprekende gemeenskap, wat tot meer akkurate diagnose van taalgestremdheid en meer doeltreffende remediëring van voornaamwoordbegrip en -gebruik mag lei.

- * Hierdie materiaal is gebaseer op werk wat finansieel ondersteun is deur die Nasionale Navorsingstigting. Enige opinie, bevindings, gevolgtrekkings of aanbevelings in hierdie materiaal is dié van die outeur en gevolglik aanvaar die NNS geen verantwoordelikheid in hierdie verband nie.

Verwysings

- American Speech and Hearing Association. 1997-2006. *Hearing screening*. <http://www.asha.org/public/hearing/testing/>
- Anderson, R.T. 1998. The development of grammatical case distinctions in the use of personal pronouns by Spanish-speaking preschoolers. *Journal of Speech, Language, and Hearing Research* 41: 394-406.
- Bain, R. 1936. The self-and-other words of a child. *The American Journal of Sociology* 41: 767-775.
- Brown, R. 1973. *A first language: The early stages*. Cambridge: Harvard University Press.
- Buitendag, M.M. 1994. *Afrikaanse Reseptiewe Woordeskattoets*. Pretoria: Raad vir Geesteswetenskaplike Navorsing.
- Campbell, A.L, P. Brooks, and M. Tomasello. 2000. Factors affecting young children's use of pronouns as referring expressions. *Journal of Speech, Language, and Hearing Research* 43: 1337-1349.
- Cole, E.B., Y. Oshima-Takane, and R.L. Yaremko. 1994. Case studies of pronoun development in two hearing-impaired children: Normal, delayed or deviant? *European Journal of Disorders of Communication* 29: 113-129.
- Cooley, C.H. 1908. A study of the early use of self-words by a child. *Psychological Review* 15: 339-357.

- Finestack, L.H., M.E. Fey, and H.W. Catts. 2006. Pronominal reference skills of second and fourth grade children with language impairment. *Journal of Communication Disorders* 39: 232-248.
- Håkansson, G. 2001. Tense morphology and verb-second in Swedish L1 children, L2 children and children with SLI. *Bilingualism: Language and Cognition* 4: 85-99.
- Hansson, K. and L.B. Leonard. 2003. The use and productivity of verb morphology in specific language impairment: An examination of Swedish. *Linguistics* 41: 351-379.
- Johnston, J.R. 2001. An alternate MLU calculation: Magnitude and variability effects. *Journal of Speech, Language, and Hearing Research* 44: 156-164.
- Leonard, L.B., E-K. Salameh, and K. Hansson. 2001. Noun phrase morphology in Swedish-speaking children with SLI. *Applied Psycholinguistics* 22: 619-639.
- Loeb, D.F. and L. Leonard. 1991. Subject case marking and verb morphology in normally developing and specifically language-impaired children. *Journal of Speech and Hearing Research* 34: 340-346.
- Marchman, V.A., C. Saccuman, and B. Wulfeck. 2004. Productive use of the English past tense in children with focal brain injury and specific language impairment. *Brain and Language* 88: 202-214.
- Moore, M.E. 1995. Error analysis of persons by normal and language-impaired children. *Journal of Communication Disorders* 28: 57-72.
- Moore, M.E. 2001. Third person pronoun errors by children with and without language impairment. *Journal of Communication Disorders* 34: 207-228.
- Pretorius, A. 1989. *Die Afrikaanse Semantiese Taalevalueringssmedium*. Pretoria: Outeur.
- Ravid, D., R. Levie, and G.A. Ben-Zvi. 2003. The role of language typology in linguistic development: Implications for the study of language disorders. In Y. Levy and J. Schaeffer (eds). *Language competence across populations. Toward a definition of specific language impairment*. Mahwah: Lawrence Erlbaum Associates. pp. 171-193.
- Ricard, M., P.C. Girouard, and T. Gouin Décarie. 1999. Personal pronouns and perspective taking in toddlers. *Journal of Child Language* 26: 681-697.
- Rispoli, M. 1994. Pronoun case overextensions and paradigm building. *Journal of Child Language* 21: 157-172.
- Rispoli, M. 1998a. Patterns of pronoun case error. *Journal of Child Language* 25: 533-554.
- Rispoli, M. 1998b. Me and my: Two different patterns of pronoun case errors. *Journal of Speech, Language, and Hearing Research* 41: 385-393.

- Rispoli, M. 2005. When children reach beyond their grasp: Why some children make pronoun case errors and others don't. *Journal of Child Language* 32: 93-116.
- Schütze, C.T. 1999. Different rates of pronoun case error: Comments on Rispoli (1998). *Journal of Child Language* 26: 749-755.
- Southwood, F. 2005. A comparison of the responses to three comprehension and three production tasks assessing the morpho-syntactic abilities of Afrikaans-speaking preschoolers. *Per Linguam* 21: 36-59.
- Southwood, F. 2006. An investigation of the morpho-syntactic abilities of Afrikaans-speaking preschoolers. *Southern African Linguistics and Applied Language Studies* 24: 33-35.
- Southwood, F. and A.F. Russell. 2004. Comparison of conversation, freeplay, and story generation as methods of language sample elicitation. *Journal of Speech, Language, and Hearing Research* 47: 366-376.
- Stark, R.E. and P. Tallal. 1981. Selection of children with specific language deficits. *Journal of Speech and Hearing Disorders* 46: 114-122.
- Vorster, J. 1980. *Toets vir mondeling taalproduksie*. Pretoria: South-Afrikaanse Instituut vir Psigologiese en Psigometriese Navorsing.

Bylaag A1: Inligting oor deelnemers met taalgestremdheid se taaltoetsresultate (AST, ARW, TMT)

STG	KA ^a	AST							A R W	T M T
		Woordeskat [R] ^b	Woorddefini-sies [E] ^c	Insluiting/Uit-sluiting [R]	Vergelykende relasies [R]	Voornaam-woorde [R,E]	Veelvuldige woordbeteke-nisse[R,E]	Sinonimie E]		
1	67	-	-	-	-	-	-	-	83 ^d	-
2	76	-	-	-	-	-	-	-	<68	-
3	62	-	-	-	-	-	-	-	-	-
4	80	60-65	-	-	-	-	-	-	-	-
5	76	54-59	48-56	-	60-62	36-47	51-71	-	-	-
6	74	45-47	69-74	-	-	-	-	63-68	78-80	-
7	72	54-59	<36	-	-	-	-	36-47	48-59	-
8	57	-	-	-	-	-	-	-	-	-
9	77	-	-	-	-	-	-	-	-	-
10	77	-	-	-	-	-	-	-	-	-

^aKA=kronologiese ouderdom in maande ten tye van toetsing. ^bR=reseptief. ^cE=ekspressief.

^dToetstellings gegee as ouderdomsekwivalente in maande.

Bylaag A2: Inligting oor deelnemers met taalgestremdheid se taaltoetsresultate (middele buiten die AST, ARW, TMT)

STG	KA ^a	TACL-R/III				Renfrew	Informele toetsing	Ander
		Woordklas	Grammatika-le morfeme	Uitgebreide frases&sinne	Slegs gemiddeld beskikbaar			
1	67	--	--	--		Ouderdoms-toepaslike sinslengte	Wordvolgorde en gebruik van grammatale morfeme afwykend	--
2	76	--	--	--		--	E ^b gebruik van meervoude, voornaamwoorde problematies. R ^c taal ten minste 8 maande vertraag; beide R en E ouerdomsontoepaslik. Oorgebruik van om-skrywings	--
3	62	51-54	41-44	53-55		--	--	--
4	80	--	--	--		39, Woordvindingsprobleme	E taal moontlik op dieselfde vlak as R	--
5	76	--	--	--		--	--	GLU ^d =5.7
6	74	--	--	--	--	--	--	--
7	72	--	--	--		--	--	--
8	57	--	--	--		--	--	PLS-3 R 58, E 48
9	77	--	--	--		--	--	TOLD-P R 72, E 54
10	77				66	--	E taal 60	--

^aKA=kronologiese ouerdom in maande ten tye van toetsing ^bE=expressive. ^cR=receptive.

^dGLU=gemiddelde lengte van uiting.

Bylaag B: Toetsitems (nie in aanbiedingsvolgorde nie)

Items van die prentseleksie- (begrips-)taak

Oefenitems: *Wys vir my 'Hy staan in die hoekie'*

Dit is haar skoen

Ek staan langs die tafel	Dit lê op die grond [<i>dit</i> = die koerant]
Dit is my roomys	Sy oor is af [<i>sy</i> = die koppie se]
Die voël sit op my	Die koerant lê daarop [= op die tafel]
Die kat lek my	Ouma vryf dit [<i>dit</i> = 'n kussing]
Jy staan op die stoel	Ons wys 'n prentjie
Dit is jou roomys	Dit is ons speelgoed
Die voël sit op jou	Die reën val op ons
Die kat krap jou	Die seuntjie sien ons
Hy sit by die tafel	Julle wys 'n prentjie
Dit is sy roomys	Dit is julle speelgoed
Die voël sit op hom	Die reën val op julle
Die kat lek hom	Die seuntjie sien julle
Sy sit by die tafel	Hulle wys 'n prentjie
Dit is haar roomys	Dit is hulle speelgoed
Die voël sit op haar	Die reën val op hulle
Die kat lek haar	Die seuntjie sien hulle

Items van die oordeel- (begrips-)taak

Oefenitem: *Ek is wakker*

*Dit is sy hoed [i.p.v. <i>my</i>]	Die eend swem langs hom
Die roomys val op my	Die krap knyp hom
*Die hond krap ek [i.p.v. <i>my</i>]	Sy staan
*Jou slaap [i.p.v. <i>jy</i>]	Dit is haar roomys
Dit is jou roomys	*Die vark kyk na sy [i.p.v. <i>haar</i>]
*Die skoenlapper sit op haar [i.p.v. <i>jou</i>]	*Die hond dra jou [i.p.v. <i>haar</i>]
Die hond krap jou	*Sy staan in die hoek [i.p.v. <i>dit</i> , waar <i>dit</i> = 'n besem]
*Sy is wakker [i.p.v. <i>hy</i>]	Sy hare is af hoek [waar <i>sy</i> = 'n besem se]
*Dit is hom hoed [i.p.v. <i>sy</i>]	

Die koppies staan bo dit	*Dit is haar roomyse [i.p.v. <i>julle</i>]
*Ouma hou haar vas [i.p.v. <i>dit</i> , waar <i>dit</i> = breiwerk]	Die hond spring oor julle
Ons lees boeke	Die koei jaag julle
*Dit is hulle kar [i.p.v. <i>ons</i>]	Hulle lees boeke
*Die hond spring oor julle [i.p.v. <i>ons</i>]	*Dit is hulle tuin [i.p.v. <i>julle</i>]
Die koei jaag ons	Die hond spring oor hulle
*Hy lees boeke [i.p.v. <i>julle</i>]	*Die skaap jaag ons [i.p.v. <i>hulle</i>]

Items van die sinsvoltooings- (produksie-)taak

Oefenitems: Sy eet 'n roomys, maar (hy eet 'n appel)

Dit is sy koffie en dit is (haar melk)

Hy eet 'n roomys, maar (ek eet 'n appel)

Hy eet waatlemoen, maar (ek eet koek)

Dit is my romp en dit is (my broek/romp)

Dit is my voet en dit is (my neus)

Die eekhoring sit langs my en die hond sit (langs my)

Die voël sit op my en die haas sit (op my)

Dié kat krap my en dié kat krap (my)

Die koei jaag my en die perd jaag (my)

Hy staan, maar (jy sit)

Hy lê, maar (jy staan)

Dit is sy lepel en dit is (jou mes)

Dit is sy oë en dit is (jou hare)

Dié hond sit langs hom, maar dié hond sit (langs jou)

Dié perd spring oor hom, maar dié perd spring (oor jou)

Dié hond krap hom, maar dié hond lek (jou)

Dié hoender pik hom, maar dié hoender pik (jou)

Hy eet pizza, maar (sy eet 'n stokkielekker)

Hy voer die eekhoring, maar (sy voer die voëls)

Dit is my hand en dit is (haar hand)

Dit is sy kar en dit is (haar bal)

Die hond sit langs my en die kat sit (langs haar)

Dié slang seil oor my en dié slang seil (oor haar)
Die hond lek my en die kat krap (haar)
Dié perd sien my en dié perd sien (haar)
Sy hang in die lug, maar (hy sit op die grond)
Jy staan op die tafel, maar (hy staan op die stoel)
Dit is haar swembroek en dit is (sy trui)
Dit is my glas en dit is (sy glas)
Die baba kyk vir my en die hond kyk (vir hom)
Die hond kyk vir jou en die perd kyk (vir hom)
Die hond lek my en die baba lek (hom)
Dié bul skop haar en dié bul skop (hom)
Ek is skoon, maar (dit is vuil) [waar *dit* = 'n handdoek]
Jy is groot, maar (dit is klein) [waar *dit* = 'n klein figuurtjie]
Dit is haar nek en dit is (sy nek) [waar *sy* = 'n bottel se]
Dit is haar tandé maar dit is (sy tandé) [= 'n kam se tandé]
Die baba kyk vir my en die hond kyk (daarvoor / daarna / vir dit) [= vir 'n klein figuurtjie]
Dié apie spring oor my en dié apie spring (daarin / in dit) [= in 'n boks]
Die hond lek my en die seuntjie lek (dit) [waar *dit* = 'n klein figuurtjie]
Dié kat krap my en dié kat krap (dit) [waar *dit* = 'n rusbank]
Sy drink water, maar (ons eet vrugte)
Sy spring tou, maar (ons praat op die foon)
Dit is hulle musse en dit is (ons skoene)
Dit is haar tasse en dit is (ons tasse)
Die voël vlieg oor hulle en die vlieër vlieg (oor ons)
Die vliegtuig vlieg oor hom en die helikopter vlieg (oor ons)
Die kat krap hom en die honde lek (ons)
Dié vark sien hom en dié vark sien (ons)
Ons eet koek, maar (hulle eet roomys)
Ons staan, maar (hulle sit)
Dit is ons hare en dit is (hulle hare)
Dit is sy boek en dit is (hulle boeke)
Die voël sit op my en die voëls sit (op hulle)
Dié emmer val op my en dié emmer val (op hulle)

Die hond lek haar en die katte krap (hulle)
Dié seun stamp haar en dié seun stamp (hulle)
Sy eet appels, maar (julle eet piesangs)
Hy sien 'n skaap, maar (julle sien 'n koei)
Dit is haar bene en dit is (julle bene)
Dit is sy hond en dit is (julle honde)
Die skoenlapper sit op jou en die skoenlappers sit (op julle)
Dié bal hop op jou en dié bal hop (op julle)
Die vark lek hom en die honde lek (julle)
Dié seun spuit hom nat en dié seun spuit (julle) nat